

**Zeitschrift:** Igl Ischi : organ della Romania (Societat de Students Romontschs)

**Herausgeber:** Romania (Societat de Students Romontschs)

**Band:** 59 (1974)

**Heft:** 3

**Artikel:** L'attracziun della Capitala

**Autor:** Cadruvi, Donat

**DOI:** <https://doi.org/10.5169/seals-881953>

### Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Siehe Rechtliche Hinweise.

### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. Voir Informations légales.

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. See Legal notice.

**Download PDF:** 14.03.2025

**ETH-Bibliothek Zürich, E-Periodica, <https://www.e-periodica.ch>**

# L'attracziun della Capitala

da Donat Cadruvi

I.

Mia novella «La famiglia Danton» (1972) entscheiva cun in capetel: En in pign marau. Ina lectura ha qualificau quella part della novella sco emprova d'ironisar nossa Capitala, il marau de Cuera. Il sribent scriva, publichescha e confida aschia ses plaids al giudicar dil lectur. El ha ni la pusseivladad ni il basegns de curreger tals pareris. Quei ei bein era la sort dil present tractat che vul esser screts senza malart. Al lectur beinvlulent e critic seigi detg mo ton: Tgi che plaida della Capitala, plaida de tuttas Capitalas. Per biars ei quei Berlin, per auters Bern, per nus eis ei Cuera. Demai ch'igl ei buca pusseivel d'evitar en relaziuns stretgas ual quella conclusiun e demai che biars vegnan ad interpretar il tractat sco tendenza anti-Cuera, viel jeu confessar la bial'entschatta e sinceramein: Jeu carezel il marau de Cuera, sias casas, sias streglias, sia populaziun, ses vezis e sias bellezias. A Cuera hael jeu passentau ils onns denter buob ed um, ils bials onns alla Scola cantunala ed ils onns dellas experienzas de professiun.

Eis ei necessari de segiustificar? Anzi, igl ei uras de discuorer dils fatgs e buca dellas intenziuns dil sribent – intenziuns che vegnan a mauns al lectur aschia ni aschia.

II.

L'attracziun della Capitala sa esser in tema per il pictur, per il poet, per igl um della musica e dil cant, per quel che mira ed examinescha il decuors dils fatgs politics della tiara. In tema per tuts che han temas. Aschia sa la descripziun esser statistica, historica, politica, fegliet, sentenzia e termagl.

Per igl um, che vul drizzar sia egliada sin ils fatgs generals, dat ei nuot au-  
ter che la voluntad de serender sin la muota per mirar, ponderar e descri-  
ver.

Da quella collina anora vesa el, co il marau crescha, co el ei gia daven-  
taus gronds. Il marau dellas muntognas. Lunsch entuorn dat ei buca  
maraus. Nossa Capitala ei il marau denter ils loghens gronds della Bas-  
sa e quels da tschei maun dils cuolms. Quei dat a sia historia ed a sia

funcziun, era a siu caracter ed al caracter dils habitants ina tempra. Ei dat era marcaus senza tempra. Aschia san ins capir l'entira impurtonza della qualificaziun che Nicolin Sererhard ha dau a nossa Capitala en sia «Einfalte Delineation»: «. . . Vorort des Bunds und Prinzipalort des Landes. . .». Daveras: Il liug principal lunsch entuorn.

Quei fuss de concretisar per nies temps: Igl onn 1930, quei temps della crisa, veva nossa Capitala 15 500 habitants. Trent'onns pli tard fuvan ei gia 24 500 olmas – ed oz eis ei varga 32 500. «Gewaltiger Confluxus der Völkern. . .» scheva nies Nicolin Sererhard. E nossa perdetga, quel che fa la controlla dils habitants a Cuera, pretenda ch'ei seigi stau aschia era suenter il temps della famusa cronica sererhardiana. Biars ein Grischuns, biars ein jasters. Il marcau, fitgaus vi encunter las costas dils cuolms, ei staus habels e ferms avunda per retscheiver ed occupar, per nutrir e divertir jasters e dumiastis. Per biars, aschia raquentan nossas perdetgas en Casa cumin a Cuera, ei nossa Capitala mo l'emprema staziun sil viadi grond viadura el mund nunenconuschent.

Ei entscheiva cun nossa giuventetgna. Varga 1 600 emprendists dils mistregns van a scola – e ston ir a scola – ella Capitala per daventar umens e femnas dil fatg. In pèr tschien auters ed outras fan la scola professiunala dils negoziants.

Nus fagein menziun dellas scolas: La Capitala ei era en quels graus la Capitala della attracziun. La Scola cantunala daventa la scola della regiun de Cuera, mo mantegn era il num e las simpatias d'ina scola per tutt Grischuns. La Capitala ha ina scola superiura per ils teologs catolics, per quels della tecnica, per las futuras negoziantas.

O d'entuorn ein ils spitals.

Amiez ei la perschun.

Sisum ei la Catedrala.

Enzanua ina garnischun ch'ins numna la Caserna.

Pia la suprema administraziun de tutt fatgs humans e bunamein ultra-terresters. Ils ultims scalems della hierarchia e della carriera dils paupers humans. Il center della politica.

Ei ha num documentar: De nos tschun aultstimai cussegliers guvernativs han quasi tutti il domicil ella regiun della Capitala. Quei vala era per ils

dus cussegliers dils stans. Quei vala per duas tiarzas dils cussagliers nazionals grischuns. Quei vala per 20% dils commembres dil Cussegl grond. Quei vala per 80% dils derschaders cantunals e per la gronda part dils commembres della dertgira administrativa.

Il domicil ella regiun ei buca mo statistica formala. Quei ei pussonza, influenza, attaschonza al liug ed a sias instituziuns.

La Capitala dat tettg allas interpresas ed allas organisaziuns della industria e dil mistregn. Igl ei la centrala dils secretaris, gie schizun della administraziun dils purs! De quei dat perdetga in messadi dil president dil marcau dils 16 de fenadur 1964 al cussegl dil marcau, in document che sto remplazzar ulteriuras indicaziuns. Il scribent seperschuada de quei ch'ei daventau suenter 1964 sch'el mira viadora encunter il Plaun de cavals, giu encunter il Rein e dalla Val renana giudora. Igl ei buca mo vengnas. Igl ei era fabricas, casaments, indezis dil marcau modern e tecnic.

Nua ch'ei ha regenzas, hai era schuldada, emploiaus. Il Cantun Grischun dat lavur a varga 2000 persunas. Ver 50% de quels vivan ella regiun della Capitala.

La Capitala ei era la Capitala dellas gasettas. Ella discuora di per di cun ils carstgauns, era cun quels che vivan enzanua auter. E quels che stattan lunsch siaden elllas valladas, viadora encunter ils cunfins, audan la vusch della Capitala. Leu vegn la vusch della Capitala rinforzada da radio, biblioteca, televisiun. Ins sa ch'igl ei savens la vusch della Capitala. Pader Alexander Lozza ha giu udiu la vusch dils zenns della Catedrala entochen si Surmir. Ei fuva ils zenns della giustia!

Si sper il mir santeri della Cuort ruaussa nies grond Giacun Hasper Muoth. El ei buca staus il sulet Romontsch che ha schau la veta ella Capitala. Auters ein naschi e han luvrau leu sco sch'els fussen mai stai en in marcau. Auters ein daventai Romontschs della Capitala. (Leu han ils Romontschs lur centrala, lur administraziun, lur uniuns, lur scienziats e bein era il pli grond diember con-sorts de lungatg e derivonza.) Mo ei ha num seperschuader de lur impurtonza: Numerus cumponists e scribents ein leu. Tschei di hiel jeu fatg ina retscherca per dar caschun a certa glieud «interessanta ed instruida» de s'exprimer concernent lur relaziuns cun la Provinzia. Buca meins che 80% de mes adressats stattan a Cuera. Tgei surpresa – e tgei realitat!

Aschia ei la Capitala: Decorada dal renum historic. Preferida da sia situaziun geografica. Distinguenda da sia carschen exteriura e da sia impurtonza materiala. Da leu derivan ils decrets, las normas, mo era la musica, la poesia, il schar encrescher per ils temps vargai.

Ei deva in temps che repeteva cun mintga caschun la polaritat Capitala-Provinzia, cunzun quei che pertuccava las relaziuns denter Cuera e la Surselva. Ina relaziun, marcada e stigmatisada da combats politics maluardai. Expressiun d'in svilup che dat raschun alla Capitala (sch'il diember e la forza ei ina raschun). Ina expressiun dil sedustar hanau dil vitg e della val encounter il mund enguord che maglia tut. Mo ei dat era igl aspect social: La Capitala ei malgrad tut il marcau dils cuolms, pia nies agen marcau. Leu vivan biars de nos enconuschents ed amitgs, de quels che patratgan e sentan sco nus.

Provinzia duei restar Provinzia. La Capitala duei restar la Capitala. Mo ei dat lunsch sur Provinzia e Capitala ora igl artg della medema sort, della humanitat, della simpatia vicendeivla.

Denter Provinzia e Capitala dat ei biaras dependenzas. Ei dat era attracciuns viceversa.

Perquei che la Rezia ei fatga e formada aschia, eis ei bi de turnar giu dalla muota, de percuorer las gassas, de mirar siper casas e casaments – e bi de turnar viadora sin la vasta Provinzia.

matg 1974